

Xcarta San Pablo huantü pulana tzoknikolh Tesalonicenses

KATAPAJMUJUN TACHIHUIN:

Xlicana pi yuma carta tlak pulana tzokcanit ni xahua makapitzin tatzokni huantü tataksoy c-Xasasti Talaccaxlán, usu Nuevo Testamento. Pablo tzokli yuma carta acxni xtaputlakama tipuxamacahu, usuchí tipuxamacahuitu cata lantla tilacáchilh Cristo. Lipaxuhu xakatlilacankoy yama huanti lipahuanoy Cristo, chu huilakó c-xacachiqun Tesalónica, cumu xlacán luhua akstítum lipahuanonit xtachihuin.

Masqui xlacán xpuhuankoy pi luhua akstítum xlipahuanoy Dios, fuerza atuyá xpuhuankoy, ni luhua lihuana xtalulokkoy pala xlicana nalakastakuanankoy calinín acxni naniyahu. Pablo maluloknikoy yuma tastacyahu huantü xlacán atuyá lipuhuanoy, chu litakalhchihuinankoy pi luhua akstítum calipahuankolh pi luhua chuná nalay acxni namimpalay xlimaktuy Cristo. Namá huanikolh: “Acxni ni pala tzinú liacatzihuilahu nahuán, Cristo naquincalakminán” (5:2).

Xahuachí xlá litakalhchihuinankolh pi catapaxuhuan calatamakolh, chu xliankalhín catlahuanikótit Dios mioración, chu capaxcatcatzinikolh xlipacs huantü xlá maxquikoy c-xlatamatcán.

Pablo paxcatcatziniy Dios xpalacatacan xtaçanajlanín xala c-xacachiqun Tesalónica

1 Quit Pablo, chu xahua Silvano, chu Timoteo ti quimaktayakoy, ccatzoknimán yuma carta xlipacs huixín natalanín huanti macxtum lakataquilhputayátit Dios chu huilátit c-xacachiqun Tesalónica, sampi acxtum tapaksiniyátit Dios, xahua Quimpuchinacan Jesucristo. Clacasquin pi Dios cacalakalhamán, chu cacamaxquin tlan latamat.

²Quin xliankalhín cmaxquiyahu paxcatcatzinit Dios xlipacs huixín mimpalacatacán, na xliankalhín ccamapacuhuiyán c-quioracioncán.

³Na ankalhín cmaxcatcatziniyahu Dios mimpalacatacán lantla huixín akstítum liscujnitántit xtachihuin caj xpalacata cumu xlicana lipahuanátit, chu lantla xlicana lapaxquiyátit, chu luhua macxtum laliscujnitántit, chu cumu chunatiyá kalhkalhipátit huantü camalacnüninítan Quimpuchinacan Jesucristo, antá kalhiyátit litlihuaka, chu paxuhuanapatiyátit lantla caxatucahua tapatín calakchinítan.

⁴Natalanín, quin stalanca ccatziyahu pi Dios luhua calakalhamanán, chu man calacsacnitán laquimpi xlakskatan nahuanátit. ⁵Sampi yama quilhtamacú acxni quin ccaliakchihuihanán xtachihuin Cristo huantü mastay laktáxtut, ni caj xman

huá quintachihuincán licanajlátit huampi na ucxílhítit lantla xlicana ckalhiyahu xlitlihuaka Espíritu Santo, xahuachí quin na stalanca xaccatziyahu pi xlicana huá xtaluloktat Dios. Huixín na stalanca catziyátit lantla quin xaclamahu c-milakstipancán, caj xman huá xacputzamahu huantu atzinú huixín nacamaktayayán c-mintacanjalcán.

⁶Chanchu huixín, masqui xlicana lhuhua tapatín caquitaxtunín, huampi huixín na chuná tzucútít latapayátit xtachuná lantla quin clamahu, chu chuná lantla tilatamanit Quimpuchinacán, chu lipaxuhu maklhtinántit xtachihuín Dios chuná lantla camaxquimán tapaxuhuan Espíritu Santo. ⁷Chu huixín litaxtútít aktum xaliucxílhítit huantu tlan naucxilhkoy yama canajlanín huanti lipahuanakoy Cristo, chu huilakó c-xlicatlanca xatiyat Macedonia, xahuá Acaya. ⁸Pus antá c-milakstipancán minchá xtachihuín Dios, chu lacaxtum lakapasca nī caj xman antá c-Macedonia, chu c-Acaya, huampi na xahuá aya pacs catzicán canihuá lantla akstítum huixín lipahuanátit Dios; huá xpalacata antani calichihuínancanátit nialh talacasquín pala tí nactihuanahu mimpalacatacán. ⁹Hasta catihuá lichihuínankoy lantla quin pulana ccaquilaklachán, lantla lipaxuhu quimakamaklhtinántit c-mincachiquincán, chu lantla lakmakántit yama xatatlahuamakxtu midiosescán huantu xlakataquilhputayátit laquimpi nalipahuanátit yama xtastum Dios huanti xlicana lama xastacná, chu huá tzucútít liscujátit. ¹⁰Na chuná likalhchihuínancán lantla huixín akstítum kalhkalhipátit acxni namín xlimaktuy Quimpuchinacan Jesús huanti Dios malakastakuaninít calínin sampi huá xkahuasa. Xlicana

pi huá Jesús naquincalakmaxtuyán nī naquincamapatinicanán acxni Dios naakastacyahuakoy xlipacs huanti makasitzikonit.

Pablo lacapastaclacán lantla liakchihuínal xtachihuín Dios c-Tesalónica

2 Natalanín, huixín luhua catziyátit pi acxni quin ccaquilakchán nī luhua caj chunatá cquilachahu. ²Masqui xlicana pi xapulana, cumu la huixín catziyátit, pi makchiya xquincalikalhkamananítán, chu xquincasitzininitán c-xacachiquin Filipos, Dios quincamaxquín litlihuaka pi tlan naccalialkchihuínaniyán yama xtachihuín Jesús tú mastay laktáxtut, masqui xlicana pi na chuná lhuhua huantu cpatihu. ³Huá chuná clihuán sampi lacatancs xaccatziy huantu xacliakchihuínama, nī huá pala caj xacaktzankanítahu, nī pala chatum tí caj xacaskahuiputunahu, usu xacmacanajlikohu huantu nī xlicana. ⁴Huampi huata huá Dios tí pacs lakapasnikoy xnacucan chixcuhuin quincalilacsacni pi nacliakchihuínanahu yama lipaxuhu xtachihuín huantu mastay laktáxtut. iPus huá xpalacata quin cliakchihuínanahu xtachihuín! Acxni quin clichihuínanahu, nī huá chuná clihuanahu laquimpi nacmakapaxuhuakoyahu catihua chixcú, huata huá Dios emakapaxuhuamahu huanti catziy pacs huantu cpuhuamahu. ⁵Sampi chuná lantla huixín stalanca catziyátit pi niucxni xactzucún caliakskahuiyán lacuan tachiuhin, chu na chuná Dios quimalulokná pi niucxni xacputzahu lantla tlan naccalimaktajayán mintumincán. ⁶Na nī xacputzayahu pala tí naquincamapacxakoyán, nī pala huixín, chu na nī pala atanuj chixcuhuin. ⁷Masqui xlicana tlan

xacticamatlahuín huantu quin xacticalimapaksín caj xpalacata pī quit xapóstol Cristo, huāmpī huata nī chuná ctlahuahu, huata tzatata clītaxtuhu xtachuná lā lactzu camán c-milakstipancán, xtachuná clītaxtuhu lā chātum puscāt huanti mān cuīntajtlahuakoy, māhuikoy, chū makastackoy xcamán sampī lakcatzankoy. ⁸Pus nā chuná chú quin luhua lipecua lantla ccalakpaxquiyán, hasta pala chuná tlan xtiquitáxtulh nī caj xman huá xacticalikalhchihuínán xtachihuín Dios huāmpī nā xactimacamastahu quilatamatcán caj mimpalacatacán caj lantla ccalakcatzanán. iKalhtum ccahuaniyán pī luhua ccalakalhamanán!

⁹Natalanín, huixín stalanca catziyátit lantla quin xacmakscujmahu laquimpī natasiyutīlhay huantu naclihuayanahu; xacscujahu cacuhuíní, chū catzīsní laquimpī nītī caj chunatá naccamamakatzankaniyán lantla ccaliakchihuínán xtachihuín Dios.

¹⁰Stalanca catziy Dios, xahua huixín pī huantu akstītum clatamanītahu c-milakstipancán huanti lipahuanátit Cristo laquimpī nītī tú naquincalihuaniyán. ¹¹Nā chuná huixín catziyátit pī ankalhín ccamāakpuhuanīnītán, chū pala tī xlipuhuama, ccamāoxumixinītán xtachuná lantla chātum chixcú māxoxumixikoy acxnī lipuhuanokoy xcamán. ¹²Quin ankalhín ccalīmalacatanicansitán pī huantu akstītum calatapátit xtachuná lantla xīlatamatcán huanti xlakskatan Dios, sampī xlicānā pī huá mān calacsactasaninītán laquimpī hua lacxtum namakamaklhtīnanátit huantu camalacnuniyán nacamaxquiyán c-xacalipaxuhu xtapáksit huantu nahuiliy.

¹³Huá xpalacata quin ankalhín cpaxcatcatzīniyahu Dios huantu xlá

tlahuanit c-milatamatcán, sampī acxnī huixín kaxpáttit yamā xtachihuín Dios huantu quin ccaliakchihuínán, lipaxuhu kaxpáttit lantla minīniy kaxmatcán xtachihuín Dios, chū nī chuná puhuántit pala caj xtachihuín can catīhua chixcú. Chū xlicānā pī huá xtachihuín Dios sampī stalanca tasiyuy huantu tlahuay xtascūjut c-milatamatcán huanti lipahuanátit. ¹⁴Natalanín, acxnī huixín xcaliputzastalamán milītachiquicán caj xpalacata cumu lipahuanátit Jesús, xlicānā pī luhua patinántit, xtachuná caakspulán lantla akspulakolh yamā natalanín huanti nā lipahuankoy Jesús, chū huilakó c-xatiyat Judea, sampī xlacán nā huá xputzastalamakó tamā xlitachiquican judíos. ¹⁵Pī huatiya lītum tamā judíos huanti maknīkolh Quimpuchinacan Jesús, chū xamakan quilhtamacū nā chuná xmaknīkonītanchitā xalakmakan profetas huanti Dios xmacaminkoy catuxáhuat, chū huá chú quin nā quincaputzastalamakón. Xlacán nī pala tzinū makapaxuhuamakó Dios, chū luhua lipecua sītzinikoy xlipacs amakapitzīn tachixcuhuítat huanti nī canajlakoy tú xlacán canajlakoy. ¹⁶Huá chuná clihuán sampī acxnī quin cliakchihuínanikoyahu xtachihuín Jesús yamā huanti nī judíos laquimpī nā nalakmaxtukoy xlistacnacán, xlacán quincalactlahuaniyán, chū nī matlanīkoy nactalīkalhchihuínankoy. Huāmpī caj xman xacstucán xmaakstokuilīmakó xtalakalhīncán sampī huá chú aya lakchanit quilhtamacū lantla Dios lakmacamakó yamā tlanca tapatīn huantu xlacán minīnikoy nalipatinankoy.

**Pablo huan pī
lakapaxialhnamputunkoy
huanti xala c-Tesalónica**

¹⁷Natalanín, masqui ccatamakatlīnīn, ankalhín ccalacapastacmán, chū lantla

ama quilhtamacú ccaucxilhlacamacán
xlipacs quinacucán, chū luhua cax
cpuahuahu pī tuncán xaccalakampalán.

¹⁸Lantla maklhuahua ctipuhua pī
naccalakanachán, chū amakapitzin
natalanín nā xamputunkoyachá,
huampi akskahuiní lhuahua huantu
nitlán quincamaakspulín laquimpī
chuná naquincamachokoyán, chū
nī lay canchahu. ¹⁹Huá xpalacata
clihuán, éxatí yama huanti quin
luhua xacmacamastakohu c-xlacatín
quimpuchinacán xtachuná lantla
aktum liçaxtlahuán huantu quin
luhua naclipaxuhuayahu? ¡Xlicana
pī huixín tamá huanti lipaxuhu
nacmacamastayahu acxni namín
xlimaktuy Quimpuchinacan Jesucristo!
²⁰Xlicana pī huixín tamá huanti quin
luhua xcatzīt clipaxuhuayahu lantla
cscujma hu mimpalacatacán.

3 Cumu luhua ccatziputunahu
mimpalacatacán, huá xpalacata,
acxni nialh lay xacpatiy lantla
xaccatziputún pala tlan lapátit, aktum
ccátzilh pī caj quiacstu nactamakaxtaka
c-Atenas, ²chū ccamalakahachichán
c-mincachiquincán tama
quintalacán huanti scujnanimā
Dios lantla quimaktayama
c-quintascújut huanicán Timoteo,
laquimpī nacalakapaxialhnanán,
nacamaakpuhuanitiniyán
c-mintacanajlacán, chū
nacamahuixcaniyán c-minacucán,
³laquimpī chuná nimpala çatum
huixín tī luhua lipuhuama nahuán caj
xpalacata huantu caakspulamán, chū
nití nalilaclatayay c-xtacanajla. Huixín
catziyátit pī quin huanti lipahuanahu
Cristo xafuerza lhuahua huantu
napatiyahu huantu huá chū ucxilhátit
pī aya quincakspulamán, ⁴sampi acxni
xaccatahuilancú c-mincachiquincán,
lacatancs cticalitakalhchihuínán pī
lhuahua huantu quilipaticán xuanit,
chū xlicana pī chuná quitaxtunít

huantu aya xcatziyátit. ⁵Cumu quit nī
aktziyay xaclama sampi nī xaccatziy
lantla xlipapátit mintacanajlacán, huá
xpalacata climacanchá quilacscujni
Timoteo huanti cmaikalhasquinilh lantla
xlapátit, pala xamaktum akskahuiní
camatlahuín pī nialh nalipahuanátit
Cristo, camatlahuín talakalhín,
chū yama quintascujutcán huantu
quin xactlahuanitahu caj chunatá
laclatámalh.

⁶Huampi cumu chū aya taspitnit
Timoteo lantla quilachá c-Tsalónica,
xlá quincalitakalhchihuínán
lantla akstítum lapátit, lantla
lipahuanátit Quimpuchinacán,
xahua lantla lakalhamaninanátit.
Xlá quincahuanín pī huixín
ankalhín quilacapastaclacatanátit,
chū luhua quimpaxquiyátit,
xahuachí luhua puhuanátit pī aya
xquiucxilhpalátit, xtachuná lantla quin
ccaucxilhpuxtunimán. ⁷Pus masqui
quin lhuahua huantu cilipuhuamahu,
xahua huantu cpatimahu unú
caquilhtamacú, huampi caj xpalacata
ccatzihu pī huixín chunatiyá akstítum
lipahuanátit Quimpuchinacán,
lampala tzinú scayaj cátzalh, chū jaxli
quinacú. ⁸Cmakcatziy pī lampala tlak
ckalhípalay litlihuakā cumu huixín
chunatiyá akstítum huilinitántit
mintacanajlacán. ⁹¿Lántla cahuá chū
maktum tuncán nacmaxquikoyahu
tapaxcatcatzín Dios caj xpalacata
mintacanajlacán, chū cumu quin tlan
ckalhíyahu tapaxuhuán c-xlacatín
caj mimpalacatacán? ¹⁰Tantascaca
tantacú ctlahuayahu quioracioncán,
nī cmakaxtakahu csquiniyahu
Dios pī caquincamaxquín man
caccacxilhpalán laquimpī lihuana
naccatalikalhchihuínán huantu
ticatzankaniyán nalakapasátit
xpalacata lihuana nalipahuanátit.

¹¹Quin clacasquinahu pī huá Dios,
xahua Quimpuchinacan Jesucristo

naquincamaktayayán laquimpi tlan naccalakapaxialhnanán. ¹²Chínchu na chuná clacasquinahu pi hua Quimpuchinacán cacamaktayán laquimpi lihuacá akstítum nalapaxquiyátit, xlipacs catihua chixcuhuín capaxquikótit xtachuná lantla quin ccapaxquiyán. ¹³Na csquiniyahu Dios litlán pi cacamaxquín litlihuaká laquimpi tlan akstítum, chu nitú mintalakalhincán c-minacucán nalatapayátit, chu chuná nitú nahuán huantú nalimāxananátit usu nalitamakstuntlahuayátit c-xlacatín Quintlatín Dios yama quilhtamacú acxní namín xlimaktuy Quimpuchinacán Jesús, chu putum nataminkoy xlipacs amakapitzín huantí na tapaksinikoy nahuán. Chuná calalh, amén.

Huantí aya tapuchuhuakonít akstítum calatamakolh

4 Natalanín, quin aya ccamasiyuninitán lantla nalatapayátit laquimpi chuná tlan namakapaxuhuayátit Dios, chu xlicana lanchú chuná akstítum lapátit. Huá chú tlan ccasquiniyán litlán c-xtucuhuini Quimpuchinacán Jesús, pi hasta achuná lihuacá akstítum calatapátit.

²Xahuachí quit ccatziy pi ní napatzankayátit huantú c-xtucuhuini Quimpuchinacán Jesús cticalimapsín.

³Sampi Dios lacasquín pi xman huá naliscujátit, chu ankalhín akstítum nalatapayátit c-xlacatín, huá xpalacata ccalihuanian pi nití caxakátlih atanuj puscat lapí huí mimpuscatcán. ⁴Chatunú huixín huantú akstítum capaxquítit, chu tlan calatapátit mimpuscatcán, ní caj xman cakalhítit xtachuná lantla likamán. ⁵Ní caj xman calilacpuhuántit huantú limakapaxuhuayátit mimacnicán xtachuná lantla licatzikoy chixcuhuín huantí ní lakapaskoy Dios.

⁶Huá xpalacata ccalihuanian pi ní

pala chatum tí catzeklakaxakátlih, usu camáklhítlih xpuscat chatum chixcú, sampi pala tí chuná natlahuay Dios namaxokoniy caj xpalacata yuma talakalhín xtachuná lantla aya cticalitakalhchuhuinán. ⁷Sampi pala Dios quincalacsacnitán, ní huá quincalilacsacni laquimpi chunatiyá natlahuayahu talakalhín, huata laquimpi akstítum natalamayahu c-xlacatín. ⁸Huampi tancs ccahuaniyán pi lapí tí ya chixcú ní matlaniy, lakmakán yuma limapaksín, milicatzitcán pi ní caj chatum chixcú lakmakama, huampi hua Dios man lakmakama, sampi huá xlá camaxquinitán cspíritu Santo.

⁹Huá xpalacata, lantla nalakalhiniyátit tapaxquín, nialh xafuerza naccatzokniyán xpalacata lantla nalapaxquiyátit, sampi man Dios camacatzininitán lantla akstítum nalapaxquiyátit. ¹⁰Sampi xlicana pi chuná huixín paxquikoyátit xlipacs huantí huilakó c-Macedonia huantí lipahuankoy Quimpuchinacán Jesús, huampi ccasquiniyán litlán natalanín, pi achuná lihuacá cakalhítit tapáxquít. ¹¹Ankalhín tancs calatapátit, chu lihuana aktziyaj caliakanítit c-mincalitascujutcán xtachuná lantla quin ccalihakalhchihuinanítán, ¹²laquimpi chuná huantí ní lipahuankoy Dios cacs nalacahuankoy sampi naucxilhkoy pi lactalipahu huixín, xahuachí nakalhiyátit huantú namaclacasquinátit, chu nitú nacatzankaniyán.

Maktum quilhtamacú Jesús namín tiyakoy xlipacs huantí lipahuankoy

¹³Natalanín, quit ní clacasquín caj chunata natamakaxtakátit ní nacatziyátit xatú akspulakoy yama ninín huantí aya nikonít, laquimpi ní atuyá nalayátit, usu nalipuhuanátit xtachuná lantla akspulakoy yamá

huantí nì kalhkalhīmáko yama quilhtamacú lantla lachhahuilinít Dios. ¹⁴Sampí xtachuná lantla quin canajlayahu pì masqui Jesús nìlh, huampí lakastakuanalh calínín, pus na chuná canajlayahu pì yama quilhtamacú acxní namín xlimaktuy, Dios na namalakastakuanikoy xlipacs huantí aya nìkonít huampí xlipahuankoy, laquimpí xlacán na nataminkoy.

¹⁵Huá xpalacata quit ccalihuanian xtachuná lantla xlimapaksín Quimpuchinacán, pì xlipacs quin huantí lamahucú xastacná unú caquilhtamacú hasta acxní namín Quimpuchinacán, nì catimacpulanikohu xlipacs yamá huantí aya nìkonít, huata pulh huá xlacán nalakastakuanankoy. ¹⁶Sampí acxní nalakchán yama quilhtamacú acxní namín xlimaktuy, Quimpuchinacán natactayachi c-akapún, natakaxmata xtachihuín chatum xapuxcu ángel lantla namapaksínán, acxnitiyá nasánán xtrompeta Dios, chu xlipacs yamá huantí xlipahuankoy Cristo huampí aya nìkonít nahuán, pulaná huá nalakastakuanankoy.

¹⁷Alístalh tuncán chú quin huantí lamahu nahuán xastacná, macxtum naquincatalencanán c-akapún laquimpí cahunín napaxtokahu Quimpuchinacan Jesús, chu chuná xaliñankalhín quilhtamacú acxtum natalatamayahu. ¹⁸Pus ccahuanian pì huatiya yuma tachihuín calalimaakpuhuaninítit.

5 Huampí lapí puhuanátit xaccahuanín xatú ya quilhtamacú, usu luhua acxnitiyá nalakchán, pus quit nì lay naccahuanian sampí nì pala chatum tì catziy. ²Sampí chuná naquixatuy xtachuná lantla aya catziyátit pì acxní nì pala chatum līcatzihuij nahuán acxní xlá namín, xtachuná naquixatuy lantla acxní min chatum kalhaná catzisní. ³Acxní yama quilhtamacú chixcuhuín chuná nahuankoy: “Lanchú luhua cacs huí

quilhtamacú, max nì naj tú catiñalh”, huata acxnitiyá namín tapatín huantú namalakspukoy, xtachuná lantla akspulay chatum puscát acxní nialh xacstú lama, xamaktum acxní natzucuy catzanajuanán, chu namalakatuncuhuy eskata, chu nì lay catilakapáxtokli, usu natzalamakán xtapatín. ⁴Huampí ccahuanian, natalanín, pì huixín nítú lapátit capaklhtutá laquimpí acxní nalakchán yama quilhtamacú, acxní namimpalay xlimaktuy Quimpuchinacán, laquimpí nì huampala nì līcatziyátit nacalakchinán xtachuná lantla chatum kalhaná caj xalán min.

⁵Xlipacs huixín antiyá tapaksiniyátit cacuhuini, chu xala caxkakaná huixín antani huí Dios; quin nì antá tapaksiniyahu c-xalakacapoklhua latámat, na nimpala xala catzisní.

⁶Huá xpalacata quit ccalihuanian pì nialh tilhtatatahuilayahu xtachuná lantla tì nì lakapaskoy Dios, huata quincaminian pì līhuana nalacahuantahuilayahu, chu skálalh natahuilayahu. ⁷Sampí huixín catziyátit pì xlipacs huantí lhtatakoy, catzisní lhtatakoy, chu huantí huanankoy masqui catzisní kachikoy. ⁸Huampí xlipacs quin huantí tapaksiyahu cxxkakanat Dios, chu cacuhuini latamayahu quincaminian pì chunatiyá lacastalanca natalatamayahu. Huá tlan nalitamaktayayahu quintacanajlacán, xahua tapáxquit, chu xtachuná lantla quintaknucán xalicán tú nalitamaktayayahu huá quintacanajlacán lantla tancs catziyahu pì quilacán quiakaputaxutacán.

⁹Sampí Dios nì chuná lacasquín pala quin napatinanahu caj xpalacata quintalakalhincán, huata xlá lacasquín pì caj xpalacata Quimpuchinacan Jesucristo nakalhiyahu akaputáxtut.

¹⁰Sampí huá Jesucristo nìlh caj quimpalacatacán laquimpí pala

xastacná lamahu, usuchí pala acxní naniyahu quitaxtuy pi huatiyá acxtum talamahu nahuán. ¹¹Pus hua yumá xpalacata, ccalihuanian pi ankalhín calamahuixcanítit, chu calalimaakpuhuaninítit xtachuná lantla laliscujpatittá.

Pablo huanikoy xtacanjalanín lantla xli latamacán

¹²Natalanín, quit ccahuaniyan pi cacacninanítit xlipacs huanti scujnanikoy Dios caj mimpalacatacán, huanti calitakalhchihuinanám lantla mililatamacán c-xlacatín Quimpuchinacán. ¹³Xlacán luhua xli lat pi huixín napaxquiyátit, chu nacacninaniyátit caj xpalacata yama tascújut huantu xlacán lakayakolh. Xahuachí acxtum calatalalipítit chatunu chatunu, nití casitzinítit.

¹⁴Na chuná ccahuaniyan pi cahuanítit cascujkolh tama natalanín huanti ni scujputunkoy, camahuixcanikótit huanti taxlajuanimakó, huanti ni laktlihuacán, huixín namaxquikoyátit takpuhuanín, xahuachí nití calitlakuántit lantla acxtum capaxuhuanalipinikótit amakapitzín.

¹⁵Luhua cuintaj catlahuátit, ni chatum la huixín pala natlahuanicán tu nitlán, na chuná namakaxokonán, huata xaliankalhín huantu tlan tatlahu catlahuanikótit mintacanjalanicán, huampi na pacs chuná calatalapátit xlipacs catihuá.

¹⁶Xahuachí xaliankalhín chapaxuhua calatalapátit. ¹⁷Ni anán xtajaxni catlahuátit mioracioncán.

¹⁸Xlipacs huantu xlá camaxquiyán huixín calipaxcatcatzinítit Dios, sampi xlá chuná lacasquín nalatapayátit huanti lipahuanátit Cristo Jesús.

¹⁹Ni calactlahuátit huantu Espiritu Santo tlahuaputún c-milatamacán.

²⁰Na chuná ccahuaniyan pi ni pala

chatum calakmakankótit tamá huanti calihihuinanamputunkoyán huantu huanakoy pi xtalacapastacni Dios.

²¹Huampi huata camininiyan pi lihuana calacapastáctit lapi xlicana tamá huantu lichihuinanca, chu huantu takataksa pi hua xtalulóktat, calacsacxtútit laquimpi nalitamaktayayátit c-milatamacán; huampi huantu catziyátit pi ni xtalulóktat calakmakántit.

²²Niucxni calimakaxtáctit pala ti nacamatlahuiyan huantu nitlán, usu ni camininiyan natlahuayátit.

²³Quit csquiniy litlán Dios huanti mastay lipaxuhu latamat pi huá putuminica cacamaakstítumilín, lantla c-mintalacapastacnicán, na chuná lantla c-milistacnacán, xahuá c-milichatuminacacán, laquimpi chunatiyá nitú kalhiy xtalakalhín nahuán hasta acxní namín Quimpuchinacan Jesucristo.

²⁴Sampi xlicana pi tama Dios huanti calacsacnitán pacs namakantaxtiy c-milatamacán huantu xlá camalacnüninítan natlahuay.

Pablo huanikoy hasta chalí natalanín

²⁵Natalanín, na chuná casquiniyan litlán pi casquinítit Dios pi naquincamaktayayan c-quintascújut.

²⁶Xlipacs huanti antá huilakó chu lipahuanakoy Cristo, huantu quimpalacata caquimacatiyanikopítit; xlipacs natalanín huantu lipaxuhu caquiaklhchapakxonítit, chu lacatítum calacatzuckopítit huantu quimpalacata.

²⁷C-xtucuhuini Quimpuchinacán quit calimapaksiyan pi calikalhtahuakanítit xlipacs huanti lipahuanakoy Jesús yuma quincarta.

²⁸Pus hua Quimpuchinacan Jesucristo xlipacs huixín xataxajni cacasiculanatlahuán.